



Inatsisartunut ilaasortaq
Erik Jensen, Siumut
Maani/

§ 37 naapertorlugu apeqqummut nr. 32/2026-mut akissuteqaat

Inatsisartut suleriaasissaanni § 37-mi imm. 1 naapertorlugu Naalakkersuisunut aalisarneq pillugu ingerlatseqatigiiffinnut aamma avammut tunisisarnernut tunngassuteqartunik apeqquteqarputit. Apeqqutit suliaasaqarfigisannit akineqartussanngorlugit innersuunneqarput.

24-02-2026
Suliap normua: 2026 - 3981
All. nr. 26251213

Postboks 269
3900 Nuuk
Oq. (+299) 34 50 00
Fax. (+299) 34 63 55
E-mail: apn@nanoq.gl
www.naalakkersuisut.gl

- 1. Aasianni tunisassiorfik Polar Raajat piginnittuii kikkuppat, suminngaanneerpat piginnittuunerisalu procentinngorlugit aggulunna qanoq aggulussimasuppat?**

Ad 1) Nalunaarsuiffik CVR naapertorlugu Polar Raajat Polar Seafood Greenland A/S-imit 50-66,66%-imik aamma Polar Seafood Denmark A/S 33,33-49,99%-imik pigineqarput. Ingerlatseqatigiiffik Nuummi Aasiannilu tunisassiorfiuteqarpoq.

- 2. Aasianni tunitsivimmut Polar Raajamut tulaanneqartartut ingerlateqqinneqartarneri eqqarsaatigalugit sumut tullermut nunamut suliffeqarfimmullu tuneqqinneqartarpat?**

Ad 2) Naalakkersuisut tunisassiorfiit aalajangersimaqqissaartut tunisassiai nunanut sorlernut tuneqartarneri pillugit paasissutissanik tigusaqarneq ajorput, tunisassialli assigiinngitsut avammut tuneqarsimasut pillugit paasissutissanik taamaallaat tigusaqartarlutik.

- 3. Nunatta avataanut tuneqqinneqarnerini suliffeqarfimmut sorlernut ingerlaqqittarpat? Taannalu kikkunnit sumiuniillu kiisalu qanoq piginnittuisa piginnittuussusiat aggulugaava?**

Ad 3) Naalakkersuisut aalisarnermut ingerlatseqatigiiffiit pisisartui pillugit paasissutissanik tigusaqarneq ajorput.

- 4. Aasianni tunitsiviup ammaannarnissaa suliffiillu piunnarnissaat qulakkeerniarlugu Royal Greenland-ip A/S Polar Raajat suleqatigiumanikuuvaat? Qanga tamanna saaffiginnissutaava?**

Ad 4) Naamik, raajartassat ikilisitaa aallaavigalugit Aasianni Ilulissanilu suliffiit qanoq qulakkeerneqarsinnaanersut sulii oqaloqatigiittoqarpoq.

- 5. Suleqatigiumannittoqarsimappat, suliffeqarfik sorleq akuersisuuva/itigartitsisuuva sunalu tamatumunnga tunngavilersuutaava?**

5-mut) Apequt 4-mut akissut takuuk.

6. Royal Greenland A/S Aasianni tunitsiviup ingerlaannarnissaanik saaffignissimappat tamanna qanoq imaqarpa aammalu sunik piumasqaateqarpa? Tunisassiallu qass tons tamatumani pineqarpat?

6-mut) Apequt 4-mut akissut takuuk.

7. Naalakkersuisut aammalu Naalakkersuisuusimasut qulaani pineqartut pillugit Polar Raajat imaluunniit Polar Seafood Greenland piginnittui naapittareerpaat aammalu qanga tamanna siullermik kiisalu kingullermik tamanna ingerlanneqarpa?

Ad 7) Aalisarnermut Piniarnermullu siornatigut naalakkersuisup, Kim Kielsen-ip uangalu Polar Seafood kisimiitillugu aamma Royal Greenland A/S peqatigalugu Aasianni aalisakkerivik pillugu arlaleriarlugit ataatsimeeqatigisarpavut. Kim Kielsen-ip ulloq 25. juuni 2024 siullermeerluni ingerlatseqatigiiffinnik ataatsimeeqateqarpoq uangalu Polar Seafood Greenland A/S kingullermik ulloq 13. februar 2026 ataatsimeeqatigivara.

8. Aasianni tunitsiviup aammalu sinerissami tunitsivinni allani tamakkiisumik nunaqavissuniit kalaalliniit pigineqarnissaat Naalakkersuisut kissaatigivaat?

Ad 8) Aalisarnermut inatsimmi tunitsivinni piginnittut pillugit malittarisassanik allasimasooqanngilaq, taamaattorli tunisassiorfiit aalisakkeriviillu kalaallinit pigineqartarnissaat kissaataajuaannarpoq, taamaalillunimi inuiaqatigiit aalisarnermit amerlanerpaanik pissarsisinnaaniassammata. Taamaattorli aningaasaliisoqarnissaanik aamma aningaasaliiffitinnissamik pisariaqartitsisoqarsinnaasarpoq, taamaattumik nunanit allaneersunit piginneqateqarnissaq pisariaqarsinnaasarpoq. Tamannalu ajornartorsiutitut isiginngilarput.

9. Arctic Prime Fisheries kikkunniit pigineqarpa?

Ad 9) Arctic Prime Fisheries ApS Arctic Prime Coastal ApS-imit tamakkiisumik pigineqarpoq. Arctic Prime Coastal ApS Hentzar Petersen-imit 66,67-89,99%-mik aamma Línuskip ehf 25-33,32%-imik pigineqarpoq.

10. Arctic Prime Fisheries-imut pisassiissutigineqartut qanoq annertutigippat, taakkunanngalu qanoq annertutigisoq Nanortalimmut tulaassisussaataappat?

Ad 10) Arctic Prime Fisheries ApS Tunumi 2026-mi ima saarullittassinneqarpoq, taakkunannga 25%-it Kujataani aalisakkerivinnut tunineqassasut pisussaaffilerneqarluni:

Aalisakkat aamma aqutsiveqarfik	Pisassiineq:
Tunumi saarullik (Dohrn Banke + Tunup kujataa)	9.620,7 tonsit

Taakku saniatigut ingerlatseqatigiiffik Kitaani saarullittassaminik tunineqarpoq kiisalu Tunumi qaleralittassaateqarluni. 2026-mi pisassai ima isikkoqarput:

Aalisakkat aamma aqutsiveqarfik	Pisassiineq:
Saarulliit, Kitaa (NAFO 1D-1F)	1.400 tonsit
Tunumi qalerallit	519,3

11. Apeqqummi 2, 3 aammalu 10-mi apequtigineqartut tunngavigalugit: Pisassiissuutaasut taakkua sumut nunamut ingerlateqqinneqartarpat, nalittorsartinneqarlutillu?

Ad 11) Naalakkersuisut aalisarnermut ingerlatseqatigiiffiit pisisartui pillugit paasissutissanik tigusaqarneq ajorput.

12. Arctic Prime Fisheries-imut pisassiissutaasut Islandimut tulaanneqartarnissaannik akuersissuteqartoqarpa? Taamaassimassappat qanoq annertutigisoq Island-imut tulaanneqarsinnaatitaava? Sumillu tamanna tunngaveqarpa?

Ad 12) Kalaallit kilisaataat Tunumi aalisartut tunngaviusumik tamarmik pisaminnik Islandimut tulaassisarput. Pisat raajaappata, saarulliuppata qaleraliuppataluunniit aalisakkalluunniit allat pineqarpata tamanut atuuppoq. Inerteqquteqartoqanngilaq. Pisassat ilai tulaanneqartussaataatillugit apeqqutaavinnarpoq tamanna qanoq aaqqissuunneqassanersoq. Arctic Prime Fisheries ApS-ip pisat amerlasuut suliarineqanngitsut Islandimut tulaattarai ilumoorpoq, taakkua containerinut ikeriarlugit Kujataani aalisakkerivinni tunisassiarineqartussanngorlugit nassiunneqartarput, taamaalilluni tunisassanik tulaassisussaataitanermik piumasaqaatit naammassineqartarput. Taama iliorneq akuersissummik tunniussivigineqarnikuunngilaq, aalisakkerivinnut tunisisoqartartillugu aamma Kujataani suliffinnik qulakkeerinnittoqarsimatillugu pisariaqartutut tamanna aamma isigineqanngilaq. Pisat tulaanneqartussaataitanngitsut ingerlatseqatigiiffiup nammineq angallammi imaluunniit nunani allani aalisakkerivinnut turerusunnerlugit aalajangertartussaavai.

13. Nunatta pisuussutai aalisakkat, kinguppaat qaleruallillu nunatsinni tamakkiisumik nunaqavissuniit suliffeqarfinniit pigineqarnissaannut piumasaqaammat Naalakkersuisut isumaqataappat?

Ad 13) Aalisarnermut inatsimmi § 77 naapertorlugu ingerlatseqatigiiffiit tamarmik Kalaallit Nunaanni aalisarlutillu pisassinneqarsimasut tamakkiisumik kalaallinit ulloq 1. januar 2035-miit pigineqartussaapput, Inatsimmi § 9 takuuk. Tamatuma ingerlatseqatigiiffiit nunanit allamiunit pingajorarterummik piginnittullit piumasaqaammut nutaamut ukiunik qulinik nalimmassarnissaannut periarfissippai.

14. Imaani pisuussutitta nalingisa ingerlaartarnerat (Transfer pricing) eqqarsaatigalugit qulaajaasoqarpa, tamannalu ingerlanneqarsimappat sumut killippat? Aammalu qaqugu tamakku inuiaqatigiinnut Inatsisartunullu saqqummiunneqassamaarpat?

Ad 14) Imaani pisuussutitta nalingisa ingerlaartarneri (transfer pricing) uanga akisussaaffimma avataaniimmat tamanna pillugu Aningaasaqarnermut Akileraartarnermullu Naalakkersuisoqarfimmut tusarniaasimavunga. Imalu taakku ilisimatitsipput:

Akilerartarnermut atatillugu suliffeqarfiup allaffissornikkut nalileeriaatsinut avissaaqqanissaata iluani piginneqatigiiffiup nakkutigineqarsinnaanerani imaluunniit taasisinnaatitaanerata piumasaqaatitaqarsinnaanerani nalilersuisinnaaneq piumasaqaataavoq. Aalajangeeqataanermut sunniuteqarsinnaaneq toqqaannartumik toqqaannangikkaluamilluunniit piginneqataassutit affai sinnerlugit imaluunniit taasisinnaasut affai sinnerlugit pigineqataassuteqarnissamik piumasaqaatitaqarpoq.

Nakkutigineqartumik sunniuteqarneq immini piginneqataassutit imaluunniit taasisinnaatitaassutit affai inorlugilluunniit pigineqaraangata, sunniuteqarsinnaasutut oqaatigineqarsinnaalertarpoq. Ataatsimoorussamik aalajangiinermut sunniuteqarsinnaanermit tamanna piumasaqaataavoq, soorlu piginneqatigiissutit pillugit isumaqatigiissuteqarneq aqutigalugu.

Killissarititaasut taakkua iluini Akilerartarnermut Aqutsisoqarfiup ingerlatseqatigiiffiit nakkutigisarpai, suliffeqarfissuit killissamik qaangiillutik aningaasanik nuussisarneri malinnaaffigineqartarmata. Akilerartarnermut Aqutsisoqarfiup inuussutissarsiutit suulluunniit tamaasa nakkutigisarpai, aalisarnermit inuussutissarsiutit ilanngullugit. Naggataatigut oqaatigineqassaaq piffissami sivisuumi suliaqarsimanersut ingerlaavartumik aamma nakkutilliisoqartartoq.

Aalisarnermit inuussutissarsiutit iluini suliffeqarfissuarmut ataatsimit nakkutilliisoqartarpoq. Suliffeqarfissuaq ataaseq nakkutigineerukkallarneqarpoq, ataatsimoorumik aalajangiisinnaassuseqarluni sunniisinnaaneq uppersineqarsinnaanngimmat. Akilerartarnermut Aqutsisoqarfik massakkut nakkutigineqartut pillugit oqaaseqarsinnaanngilaq.

15. Naalakkersuisut allanik paasissutissaasinnaasunik peqarpat?

Ad 15) Kalaallit Nunaanni aalisarnermi piginneqataassutit takussutissartaat uanga Naalakkersuisoqarfimma 2025-mi suliarisimasaat innersuussutigerusuppara. Taanna uani nassaarineqarsinnaavoq: [Saqqummersitat](#)

Taassuma saniatigut avataani pisassat PNNP-mut ilaanngitsut agguanneqarneri uani nassaarineqarsinnaapput: [TAC aamma aalisakkanik pisassiissutit](#)

Inussiarnersumik inuulluaqqusillunga



Peter Borg
Aalisarnermut, Piniarnermut, Nunalerinermut, Imminut Pilersornermut Avatangiisinullu
Naalakkersuisoq